



14. april 2010

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

Apeqqut: Qeqertarsuaq talittarfeqarnikkut Naalakkersuisut qanoq pilersaaruteqarfigaat?

(Inatsisartuni ilaasortat Finn Karlsen, Siverth K. Heilmann, Knud Kristiansen, ATASSUT)

Tunngavilersuut:

Kalaallit Nunatsinni inuussutissarsiutinik siuarsaanissaq Inatsisartuni partiit tamatta tamaviaarutigigipput qularutissaanngilaq. Taamaattorli assartuinikkut periarfissat sumiiffippassuarni ajorluinnarnerisa kingunerisaanik suliffeqarfiit nioqputissiornermik suliaqartut pilersinneqartartut nioqputissiaminnik siammarterisinnaassuseqarnerisa killeqarnerisa kingunerisaanik ipitiinnarneqartarnerat illersorneqarsinnaajunnaartoq ATASSUT-mit isumaqarpugut.

Pisoq kingulleq Inatsisartuni partiit tamarmik nalunngilaat, tassalu imermik nioqputissiorfik Greenland Spring Water Qeqertarsuarmittoq nalunaarpoq assartuinnermut periarfissat iluarsiivigineqanngippata allatut ajornartumik suliffeqarfik uniinnartariaqalersinnaasoq.

Imeq nunarsuarmi eqqilunnerpaaq aammalu mamarnerpaaq tassani nioqputissiarineqarpoq nunatsinnilu nioqputissiaq taanna assut ilassilluarneqarpoq, ATASSUT-millu qularutiginnngilarput pilertoqisumik avammut tunisassiarineqarnera annertusarneqalersinnaasoq assartuinnermut akimmiffissalersorneqanngikkuni.

Taassuma saniatigut aalisakkanik suliffissuaq Royal Greenland A/S tunisassianik inerisaanissaminut akimmiffissaqartinneqartuassaaq Qeqertarsuarmi talittarfik umiarsualivimmik pissutsinut naleqquttumik taarserneqanngippat.

Tamanna tunngavigalugu ATASSUT-mit paaserusupparput siunissaq qanittoq eqqarsaatigalugu Qeqertarsuarmi talittarfiup umiarsualivinngortinneqarnissaa pillugu Naalakkersuisut pilersaaruteqarnersut.

Inussiarnersumik inuulluaqqusilluta

ATASSUT sinnerlugu Inatsisartuni ilaasortat